

Kayëta iřanar ir Şaş in Lilaya in

Akayëta aņo ro Şaş, asëfan abat Yesu, řëgwëk ang re këni okëreceņ oņanar ak. Amëd aņo, okëreceņ ok mbaņ şopara babi në end bësëyali bënëgwëş eņ. Anambeli banëbi nambelind ga bani rend mëne Yesu axo gi ex na Afexën an do axo gi bana dëņ ala. Paş gë er řëgwën řandi baņo ebi dëca eni kemënalixënënd end đal end sëyali kënebi elod gër řanar eņ. Akayëta aņo kë sëyalind mëne bër xwëta këņo Yesu Kërisët bën ařap řapëk eni nang mëne and şot këni dëņ ex aniyan and din ir din aņ. Bëte këreceņ ir bayık aņo balënd na end okëreceņ ocandař eņ, axo cot ex na anëkëra and gë Kaxanu and paş gë Kërisët aņ. Er ex gër akayëta in:

End eyeyan ed kë yëlënd aniyan eņ: 1.1-4.

End enang ed Kaxanu do gë etëfëtëli ed Kërisët eņ: 1.5-2.6.

End apela angaşax and Axwën eņ: 2-17.

End bërangořëra and Kërisët do gë obaş or Kaxanu eņ: 2.18-3.10.

Ed aņana and Kaxanu aņ do gë and okëreceņ eņ: 3.1-4.21.

End ekor ed ngwën eņ: 5.1-21.

End eyeyan ed aniyan eņ

¹ End ar hik elod gër řanar eņ, end ar wël këmi eņ, end ar wat këmo gë bangës bandëbi baņo

dëŋ eŋ këm̄un yëgwënëlin̄d. Biyi nêkondëra kënjo gë axëbënan, biyi lëkëra kënjo gë otaxan odebi ok. Mëŋ ex eyeyan ed kë yëlënd aniyān el. ² Biyi wat kënjo ar ex eyeyan ed kë yëlënd aniyān an ga hi ko ala. Biyi reyak osede orexëm ol, mëŋ këm̄un sëfëtanaxënënd mëne ar ex aniyān and din and ler gër Faba Kaxanu an şanayaxënëgu këbo. ³ End wat këmi do wël këmi eŋ, këm̄un sëfëtanënd wën bëte, ene baraxëne andamat. Ebar elo ex ed gë Faba Kaxanu do gë Asëñiŵ Yesu Kërisët el. ⁴ Eŋo këm̄un yëgwënëlin̄d ebo nëngandëraxën enim biyi ðek.

End aniyān and gër angoben eŋ

⁵ Endey end wël këmi gër Kërisët do lawënëgu këbo mun tëfëtan eŋ ex: Kaxanu angoben hi ko do ecamëdan ax gi ex na gër ola orexëm. ⁶ Angëmëne are këne rende mëne gë mëŋ bar këne do ene bayiye gër ecamëdan, bënëgwëš hi këne, er këne rinde in ax gi ex na ðal. ⁷ Barikan angëmëne gër angoben hi këne ang hi ko mëŋ gër angoben ak, abar bar këne do oşat or Yesu, Asëñiŵ arexëm oŋ këbo wunëtënd gër eñëŋëxax end ex yo.

⁸ Gë andebi këne yifayande angëmëne ene dende mëne ane mendërande na, ðal in ax gi ex na gër ola orebi. ⁹ Barikan angëmëne afut këne futënde bamena bandebi baŋ, Kaxanu, mëŋ ar ex şenene do hi ko mokwëta an, aseban këbo seban do ebo wunët gër betëmbak bend ex yo. ¹⁰ Kaxanu kënëŋo xwëtënde anëgwëš angëmëne ene dende ane mendërande na, do eyeyan edexëm el ax gi ex na gër ola orebi.

2

End ayakan arebi eŋ

¹ Obaş oram, eŋo kēmun ŷēgwēnēlind mēŋ kēn xwēŷētaxēn beñēñēnax beŋ. Barikan angēmēne ala exo mendēra, ayakan ōot kēnēŋone na ler gēr Faba Kaxanu, mēŋ exo Yesu Kērisēt, ar ōenene an. ² Mēŋ dēŋ ex angunētan and sebanaxēn kēbo Kaxanu bamēna bandēbi an ngwēn iŋ dek, bari ax gi ex na biyi fo.

³ Angēmēne asēf kēne sēfēnde bapela band Kaxanu baŋ, pēnilebo mēne anang nang kēnēŋone. ⁴ Anēgwēŷ ko rind ar kē rend mēne anang nang kēŋo Kaxanu xarak axo tēfēnd na bapela bandexēm baŋ. Dal ax gi ex na gēr ola or ala ajo. ⁵ Barikan ar fēbēk eyeyan ed Kaxanu an ex ar ñan kēŋo enim an. Ata mondako kēne nangēnde mēne abar bar kēne gē Kaxanu. ⁶ Ar kē rend mēne abar bar kēni gē mēŋ an, aŷap ŷapēk exo dīyand ang baxo liyand Kērisēt ak.

End apela angaŷax eŋ

⁷ Wēn bēmaŷe bēnd ke balēnd mbaŋ bēŋo, apela and kēmun ŷēgwēnēlind aŋo akarēk ex, ax gi ex na angaŷax. Apela akarēk aŋo, eyeyan ed wēl kēn elod gēr ŷanar el ex. ⁸ Barikan ga kēmun ŷēgwēnēlind ako apela angaŷax dēŋ ex. Dal ir gēr Kērisēt in kē ŷanayand gēr ola orewēn gayik ecamēdan el anēka kē ŷapērēnd, do angoben aŋ kē ŷañēnd. ⁹ Ar kē rend mēne gēr angoben hi ko an, do eŋo cus imaŷe indexēm iŋ, gēr ecamēdan bayi ko pere. ¹⁰ Ar ñan kēŋo imaŷe indexēm an anēka hi ko gēr angoben do er kēŋo lēnan eñēñēnax ax gi ex na. ¹¹ Barikan ar ŷus kēŋo

imaŷe indexem an, gër ecamêdan bayi ko. Gër ecamêdan ko liyand, do axo nangend na gër ed ko yend, ecamêdan el şiwên këŷo.

¹² Obaş oram, wên kemun ŷëgwênêlind gayik anang nang kën mène Kaxanu aseban seban këŷun bamena bandewên baŷ gër oŷac or Kërisêt. ¹³ Wên opaba kemun ŷëgwênêlind gayik anang nang këno ar hik elod gër ŷanar an. Wên ocambenjar gë odënaŷ kemun ŷëgwênêlind gayik axor xor këno Arangoŷëra an.

¹⁴ Obaş oram, wên kemun ŷëgwênêlind gayik anang nang këno Faba Kaxanu. Wên bëxarëk kemun ŷëgwênêlind gayik anang nang këno ar hik elod gër ŷanar an. Wên ocambenjar gë odënaŷ kemun ŷëgwênêlind gayik axemëna xemëna kën. Bëte axwëtaya xwëtaya kën eyeyan ed Kaxanu el gër oŷëkw orewên do axor xor këno Arangoŷëra an.

¹⁵ Këren ŷan na ngwên iŷ, bëte këren ŷan na bebër ex gër ngwên ro bën. Angëmëne ala exo ŷan ngwên iŷ, aŷana and Faba Kaxanu aŷ ax gi na gër emëkw edexëm. ¹⁶ Enimin ðek bebër ex gër ngwên ro bën, bebër gër aniyan bën mène ngëŷ: oŷandi od eman ok, gë eŷangen ed bebër kë watënd bangës el do gë edafênali ed napul ir gër ngwên ro el. Beŷo ax gi ex na bënd Kaxanu. ¹⁷ Xarak ngwên iŷ do gë oŷandi odexëm ok axuca wa kë xuca. Barikan ar kë rind oŷandi od Kaxanu an, din ir din ko bayi.

End arangoŷëra and Kërisêt eŷ

18 Obaş oram, gogo kë xwët ngwën iṅ. Do ang wël kën ak, arangoÿëra and gë Kërisët kë yowënd na. Xarak anëka ÿëmb këni bërangoÿëra andexëm bën. Mondako këne nangënde mëne ngwën iṅ në ekwët ex. 19 Bërangoÿëra and Kërisët bëjo gër ndebi ro dëṅ şan këni gayik ani gi bana enim bërebi. Kido bërebi hi bani abayi bayi doni.

20 Wën cëṅ, aşot şot kën panga ind yël këṅun Angoc Amënëk iṅ do wën dek anang nang kën. 21 Aÿëgwënëli ÿëgwënëli këmun gayik anang nang kën đal in do mëne enëgwëş ax gind na gër đal. 22 Ar kë hëpënd mëne Yesu ex Kërisët, anëgwëş hi ko. Ata ajo ex ngëṅ arangoÿëra and Kërisët an gayikako aḥëp ko hëpënd end Faba Kaxanu do gë Asëñiŵ Kërisët eṅ. 23 Ar hëpëk yo end Asëñiŵ ar Kaxanu eṅ, aḥëp hëp ko bëte end Faba Kaxanu eṅ. Barikan ar ŵak end Asëñiŵ an, aŵa ŵa ko bëte end Sëm eṅ.

24 Endewën eṅ cëṅ, kwëtayayin de gër oŵëkw orewën er wël kën elod gër ŷanar in. Angëmëne end wël kën elod gër ŷanar eṅ axwëtaya xwëtaya kën, wën bëte axwëtaya kënun axwëtaya Faba Kaxanu do gë Asëñiŵ. 25 Do er beya këbo in ex aniyan and din ir din aṅ.

26 Në end bër këṅun yifand këmun ÿëgwëxënëlınd eṅo. 27 Endewën eṅ cëṅ, gë Angoc Amënëk and yël këṅun Kërisët aṅ bar kën, an caland na eṅun tëyali ala. Gayikako Angoc aṅo këṅun sëyalind dek do er këṅun

sëyalind in dal ex, ax gi ex na enëgwêš. Mëŋ ex, diyayindën ang këŋun sëyalind ak.

²⁸ Awa gërëgako obaš oram, diyayindën gë Kërisët. Do nand ko šanayaw yo, ata këne bayiye ga xwëta këneŋone, yatijo ecëfëanaxik abo tækeli na. ²⁹ Angëmëne anang nang kën mëne mëŋ ar šenene hi ko, nangin bëte ar kë rind yo end šenene, Kaxanu rëw këŋo.

3

End obaš or Kaxanu eŋ

¹ Watin ang ñan këbo Faba Kaxanu ak xali këbo wăcënd obaš orexëm! Do enimin obaš orexëm wa hi këne. Gayikako bëla bër gër ngwën ro bën anëbo nang ex na, elod ano nang ex na mëŋ bëte. ² Wën bëmaÿe bënd ke balënd mbaŋ bëŋo, gërëgako dëŋ hi këne obaš or Kaxanu. Do ola or këne šote ecan ecan ol, ax canaya ex na pere. Barikan anang nang këne mëne and ko šanayaw Yesu Kërisët aŋ, ola orebi ol ang orexëm ak kë hi sam enëŋo wat ang hi ko ak. ³ Ar kë yarënd yo eŋo gër ndexëm, awunëta ko wŋunëtand do exo men ang wën ko mëŋ ak.

⁴ Ar kë rind eñëŋëanax yo, er ko rind in amena ex paš gë acariya and Kaxanu aŋ gayik emendëran el edif ed acariya ex. ⁵ Do anang nang kën mëne Kërisët yow bax exo dëxët beñëŋëanax beŋ xarak gër ola orexëm eñëŋëanax ax gi ex na. ⁶ Ar bar këni gë mëŋ yo, ax bo ex na ga ko wëndërand. Ar bayik ga ko rind beñëŋëanax an, aŋo nang ex na, elod aŋo wat ex na.

⁷ Obaş oram, ala kereŋun yifađ na. Ar kē rind end ūenene an, ar ūenene ex ang exo Kērisēt ak ar ūenene. ⁸ Ar bayik gēr beñeñenax an, ar ūabucara ex gayik ūabucara in elod gēr ūanar ko wēdērand. Gayikako Asēñiŵ ar Kaxanu an ayow yow ko, exo nēxenaxēn bandixa band ūabucara baŋ yow baxo. ⁹ Ar rēŵ kēŋo yo Kaxanu, axo mendērand na gayik aniyān and Kaxanu aŋ ex gēr ola orexēm. Axo kor na exo bayi gēr beñeñenax gayikako Kaxanu rēŵ kēŋo. ¹⁰ Mondako kēni fitarēnd bēr ex obaş or Kaxanu bēn gē bēr ex or ūabucara bēn. Ar bayik ax dind na yo end ūenene, axo gi ex na ar Kaxanu. Mondako fo ex end ar aŋo ŋan ex na abinēm eŋ.

End aminēmēra and gēr Kērisēt eŋ

¹¹ Enimin, endey eŋo wēl kēn elod gēr ūanar mēne balērindēlebo andebi rebi aŋ. ¹² Kērenēŋo tēfēteliye na Kaŷe, mēŋ ar bar bani gē Arangoŷēra an xali laŵ kēŋo abinēm. Do inēŵa laŵaxēn kēŋo? Gayikwa bandixa band mēŋ Kaŷe baŋ bañeñenax hi bax do band abinēm baŋ band ūenene.

¹³ Bēmaŷe, angēmēne bela bēr gēr ngwēn bēn aşus ūsus kēnun, kereŋun caran na. ¹⁴ Biyi anang nang kēne mēne anēka xani kēne gēr ecēs, do bakaw kēne gēr aniyān gayik aŋan ūan kēnebene bēmaŷe bēŋ. Bari ar ūsus kēbi an, gēr ecēs bayi ko. ¹⁵ Ar kēŋo ūsus yo imaŷe indexēm, alaŵ ar bela hi ko do aye nang kēn mēne alaŵ ar bela an axo cot na aniyān and din ir din aŋ. ¹⁶ Kērisēt ga yēlaya ko wa nē endebi xali gēr ecēs mēŋ nangaxēn kēne er ex aŋana

in. Biyi bête aŋap ŋapëk enëbe yële aniyan andebi aŋ bëmaŋe bëŋ. ¹⁷ Angëmëne ar şotërak gër ebar ro eŋo watënd imaŋe indexëm in ga şëmura këŋo, do exo kemën emëkw edexëm el, aŋana and Kaxanu aŋ mondake cëŋ kë ŋëpa gër ndexëm? ¹⁸ Obaş oram, aŋana andebi aŋ gilex đal do canayayindëlex gër bandixa. Kërex gi na gër ofërëya fo, bête kërex gi na eyeyan fo.

¹⁹ Mondako këne nange mëne bër đal hi këne do ebo gi fuŋ gër oŵëkw orebi gër lëngw ir Kaxanu. ²⁰ Angëmëne oŵëkw orebi oŋ dëŋ këbo nëpënd, kaş ex Kaxanu, mëŋ ar nangëk beŋ đek an. ²¹ Bëmaŋe wën bër ke balënd mbaŋ bëjo, ayëxwëra këne yëxwëraye ler gër Kaxanu angëmëne oŵëkw orebi oŋ abo nëpënd na. ²² Er këneŋo wëkaye yo, ayël këbo yëlënd gayik asëf këne sëfënde bapela bandexëm baŋ do ari këne rinde er ŋaŋ ko in. ²³ Watin er re ko ene dind ex in: ene kwëtaye oŵac or Yesu Kërisët, Asëniw arexëm ol, do ebo balërend andebi rebi aŋ, ang rek apela andexëm and yël këbo ak. ²⁴ Ar kë rind er rek bapela bandexëm an, gë Kaxanu bar këni, do Kaxanu na exo gër ola orexëm. Gë Angoc andexëm and yël këbo aŋ këne nangënde mëne alëg lëg ko gër ola orebi.

4

Epitëndër ed bëlaŵënel el

¹ Wën bëmaŋe bënd ke balënd mbaŋ bëŋo, ax gi ex na mo kwëta đek bër kë rend gë Angoc and Kaxanu bar këni bën. Kamanindënëbi aye en nangaxën mëne đal këni reyand gayik

bëlaŵënel bënëgwëš bëranjëm yowëk na gër ngwën ro. ² Mondako këno nang ar bar këni gë Angoc and Kaxanu an: ar kë reyand yo mëne Yesu Kërisët ayow yow baxo hi ko ala gër ebar ro, ajo ar Kaxanu ex. ³ Barikan ar kë reyand yo abar bar këni gë Angoc Amënëk aŋ do exo n̄p mëne Yesu Kërisët gër Kaxanu xaniw ko, ajo arangoŷëra and gë Kërisët ex. Ax gi ex na nde awël wël ban mëne arangoŷëra gë Kërisët kë yowënd? Awa gërëgako, anëka ħatëgu ko gër ngwën ro.

⁴ Wën obaš oram ol, bër Kaxanu hi kën do axor xor kënebi bëlaŵënel bënëgwëš bën gayik gë ar bar kën an fangak nēmëc gë angoc and ex gër ngwën ro aŋ. ⁵ Bëlaŵënel bënëgwëš bëjo, bër gër ngwën ro fo exëni. Mëŋ këni yeyanaxënënd end gër ngwën ro fo do bela bër gër ngwën ro bën abaxëtën kënebi baxëtënënd. ⁶ Barikan biyi bër Kaxanu hi këne do ar nang këŋo Kaxanu an, abaxëtën këbo baxëtënënd. Ar ax gi ex na ar Kaxanu an, abo baxëtënënd na. Mondako këne nangënde ang fitar këni ak ar gë Angoc and dal an gë ar gë angoc and enëgwëš an.

End aŋana and Kaxanu eŋ

⁷ Wën bëmaŷe bënd ke balënd mbaŋ bëŋo, balëringdelebo andebi rebi aŋ gayik aŋana aŋ gër Kaxanu xaniwëk. Do ar ħan këbi bela an, Kaxanu rëw këŋo do anang nang këŋo Kaxanu. ⁸ Kaxanu aŋana hi ko, ar şus këbi bela an, aŋo nang ex na Kaxanu. ⁹ Watin ang w̄asin këbo Kaxanu aŋana andexëm ak: ga laŵënëgu këŋo Aseñiŵ ar tañ arexëm an gër ngwën ro ene

cotaxêne aniyan aŋ paḅ gë mën. ¹⁰ Do aŋana aŋo er ex mêne Kaxanu ñan këbo xali lawñëngu këŋo Asëñiŵ ebo wunët gër beñëŋënax bendeḅi, xarak ax gi ex na ga ñan kënëŋone biyi.

¹¹ Wën bëmaÿe bënd ke balënd mbaŋ bëŋo, angëmëne mondako ñan këbo Kaxanu, aÿap ÿapëk biyi bëte ebo balërënd andeḅi reḅi aŋ.

¹² Elod ala aŋo wat ex na Kaxanu. Angëmëne abalër këbo balërënd andeḅi reḅi aŋ, abar ḅar këne gë Kaxanu do aŋana andexëm aŋ aye faÿayak gër ola oreḅi.

¹³ Mondake këne nangënde mêne gë Kaxanu ḅar këne? Ga yël këbo wa Angoc andexëm aŋ.

¹⁴ Do biyi, awat wat këmi eŋo, do mën këmi reyaxënënd mêne Faba Kaxanu lawñëngu këŋo Asëñiŵ exo gi Afexën ar ngwën an. ¹⁵ Ar kë

ŵa mêne Yesu, Asëñiŵ ar Kaxanu ex, abar ḅar këni gë Kaxanu. ¹⁶ Do biyi anang nang këne do aŵa ŵa këne mêne Kaxanu añan ñan këbo gayik aŋana hi ko. Do ar këḅi ñan ḅela an, abar këni ḅar gë mën. ¹⁷ Angëmëne aŋana and Kaxanu aŋ

afaÿaya faÿayak gër ola oreḅi, gë onënga fo këne šëniye akey and kiti aŋ gayik ang këne liyande gër ngwën ro ak awëndër wëndërek gë aniyan and Kërisët aŋ. ¹⁸ Gër emëkw ed ar faÿayak aŋana, anjiÿ ax gind na. Do aŋana ax paÿaya ex na gër emëkw edexëm.

¹⁹ Endeḅi eŋ cëŋ, añan ñan kënëḅene Kaxanu gë ḅela bën gayik mën ÿanak ñan këbo.

²⁰ Angëmëne ala exo dend mêne añan ñan këŋo Kaxanu do eŋo cus imaÿe indexëm in, anëgwëš ko rind gayik axo kor na eŋo cus imaÿe ind

këŋo watënd inj do eŋo ŋan Kaxanu, mëŋ ar aŋo watënd na an. ²¹ Awa apela aŋo yël këbo Kaxanu: Ar ñan këŋo Kaxanu an, ŋanëleŋo bëte imaÿe indexëm inj.

5

End angora and ngwën eŋ

¹ Ar wāk yo mëne Yesu ex Kërisët, Kaxanu rëw këŋo. Do ar këŋo ñan yo arëw an, aňan ñan këbi bëte obaš orexëm ol. ² Mondako nang këne mëne aňan ñan kënëbene obaš or Kaxanu ol: ga ñan kënëŋone Kaxanu do ga këne sêfënde er rek bapela bandexëm in. ³ Eŋan ed Kaxanu el ex ene dind ex er re ko gër bapela bandexëm in do bapela baŋo ax đak ex na. ⁴ Gayikwa ar rëw këŋo yo Kaxanu, axor xor ko ngwën inj. Do ekwëta ed xwëta kënëŋone Kaxanu el ex ekor ed ngwën el. ⁵ Noÿo ex ar xorëk ngwën an? Ax gi ex na nde ar wāk mëne Yesu ex Asëñiŵ ar Kaxanu an?

End Kërisët eŋ

⁶ Yesu Kërisët ex ar yow bax gë men oŋ do gë ošat oŋ. Gë men do gë ošat yow baxo, ax gi ex na na gë men oŋ fo. Do Angoc Amënëk aŋ kë reyand eŋo gayik mëŋ ex đal in. ⁷ Enimin, otede otas kë reyand end Kërisët eŋ: ⁸ Angoc Amënëk aŋ, men oŋ do gë ošat oŋ. Do bën bësas axet xet këbi. ⁹ Angëmëne aŵa këne wānde osede or bela ol, osede or Kaxanu ol xurik ex gi đal gayik areya reya ko end Asëñiŵ eŋ. ¹⁰ Ar wāk end Asëñiŵ ar Kaxanu an, ašot ko šot osede olo gër onden ondexëm. Barikan ar ñëpëk an, anëgwëš xwët

kêŋo Kaxanu gayikako axo ma ex na er reya ko Kaxanu end Asëñiŵ in. ¹¹ Watin er ex osede olo in: Kaxanu yël kêbo aniyan and din aŋ do aniyan aŋo gër Asëñiŵ ex. ¹² Ar ßar këni gë Asëñiŵ ar Kaxanu an kë şotënd aniyan aŋ, ßari ar ani ßare ex na an, axo cotënd na.

End aniyan and din eŋ

¹³ Eŋo këmun yëgwënëlınd en nangaxën mēne aşot şot kēn aniyan and din aŋ wēn ßer xwētak oŵac or Asëñiŵ ar Kaxanu ßēn. ¹⁴ Axwēta xwēta këne mēne Kaxanu abaxēt kêbo ßaxētënd and kenēŋo xaraye er ex yo angēmēne ang kêŋo yāndi ak ex. ¹⁵ Awa ga nang këne ako abaxēt ko ßaxētënd cale indebi in, nangēne mēne aşot këne şote er wēka kēnēŋone in.

¹⁶ Angēmēne ala eŋo wat imaŷe indexēm in ga ko ri eñēŋēnax end ax mēland na gēr ecēs, calenēleŋo. Kaxanu ata kêŋo yël aniyan aŋ. End ßer kë rind eñēŋēnax end ax mēland na gēr ecēs eŋ kēme rend. Eñēŋēnax exēna end kë wēland gēr ecēs; ame dend na ðe en calend nē end eñēŋēnax eŋo. ¹⁷ Etēmbak end ex yo eñēŋēnax ex, ßari ax gi ex na eñēŋēnax end ex yo kë wēland gēr ecēs.

¹⁸ Anang nang këne mēne ar rēw kêŋo Kaxanu yo, axo ßayi na ga ko wēndērand. Asëñiŵ ar Kaxanu an kêŋo nēkonand do Arangoŷēra an yoweŷ aŋo koranēnd na. ¹⁹ Anang nang këne mēne ßer Kaxanu hi këne do ßela ßer gēr ngwēn ßēn ðek awēña wēña këbi Arangoŷēra an. ²⁰ Barikan anang nang këne ßēte Asëñiŵ ar Kaxanu an yow bax yël kêbo onden oŋ enēŋo nangaxēne Kaxanu, mēŋ ar ex ðal an. Gē mēŋ Ar

ex d̄al an ʃar k̄ene n̄e end As̄eñiŵ Yesu K̄eris̄et.
Awa Kaxanu, ar d̄al exo do m̄eñ ex aniyān and
din aṅ.

²¹ Obaŝ oram, kw̄eñt̄ayin olaŝ oṅ.

Oniyan
Oniyan: Oniyan (New Testament+)

copyright © 2017 Wycliffe Bible Translators, Inc.

Language: (Oniyan)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

8b7902f3-5e35-5b89-86b2-c6da1be458b9